

巫山縣志卷二十

武功志

自來飲至策勳告功太廟銘鐘鼎而載旂常所以紀武功也巫邑界在荆梁之域實爲從來用武之區自秦楚交兵漢蜀攻戰以迄晉唐宋元明季流賊下逮吳逆教匪類皆於此殲渠魁而告成功苟不爲之紀載焉使斬關奪隘殺敵致果其豐功偉績磨滅而不彰也可乎哉

志武功

周武王伐紂庸蜀羌髳歌舞之師會于孟津

巫山縣志

卷二十

武功

楚懷王三十年往會秦昭王秦因留楚王要以割巫黔中之郡楚王欲盟秦欲先得地楚王怒曰秦詐我而又強要我以地不許

頃襄王二十年秦將白起拔我西陵二十二年復拔我巫黔中都

頃襄王二十三年收東地兵得十有餘萬復西取秦所拔我江旁十五邑以爲郡距秦

楚考烈王元年秦取我黔中

漢高帝發寶兵定三秦

漢光武建武元年公孫述遣其翼江玉田戎大司徒任蒲南郡太守程汎將數萬下江關擊破馮駿等軍遂拔巫及彝陵因據荆門虎牙橫江水起浮橋關樓立攢柱以絕水道結營跨山以塞陸路絕漢兵

和帝永元十三年冬巫蠻許聖以郡收稅不均怨憾遂反寇南郡十四年夏四月荊州兵討巫蠻大破降之後漢昭烈章武元年秋七月帝自將伐孫權遣吳班馮習攻破權將李翼等於巫進軍秭歸權以陸遜爲大都督督朱然等五萬人拒守

巫山縣志

卷二十

武功

諸葛武侯治蜀以八陣法教閱戰士

晉王濬用蜀兵伐吳後唐孟知祥克遂聞利夔黔梓六郡得兵三萬宋末總兵張宣率兵屯大昌之天賜城防守元兵元置夔路萬戶府

宋泰始五年十二月置三巴校尉先是三峽蠻獠歲爲抄暴故分荆益四郡立府於白帝以鎮之又以孫謙爲巴東建平太守勅募千人自隨謙曰蠻夷不賓蓋待之失節耳何煩兵役以爲國費遂不受至郡開布恩信蠻獠翕然懷之競餉金寶謙皆慰諭不受

梁元帝承聖二年武陵王紀舉兵由外水東下至巴東知侯景已平乃自悔以既稱尊號不可復爲人下遂至西陵秋七月辛未巴東民符昇等斬峽口城主公孫晃降於王琳謝吞仁任約攻侯劼破之拔其三壘於是兩岸十四城俱降紀不得退樊猛擊斬之

唐高祖時李孝恭以山南招討大使徇巴蜀下三十餘城拜信州總管時蕭銑據江陵孝恭討之造艦習水戰自夔州東擊蕭銑時峽水方漲諸將候水落李靖曰兵貴神速吾今乘江漲掩其不備可成擒也乃帥戰艦五

巫山縣志

卷二十

武功

三

千餘東下銑果不爲備拔其荆門宜都二鎮屢破其軍進圍江陵降之

唐文宗龍化元年嘉州刺史叛降於王建建封假子宗壽爲嘉王永平四年荆南高季昌侵蜀巫山道嘉王宗壽敗之

周天保元年信州蠻冉令賢等據巴峽黨與連結詔陸騰督司馬裔討之

宋淳化中王小坡李順作亂攻陷施夔等州郡知夔州慕容德琛多方禦之復克十餘郡民免鋒鏑

宋理宗嘉熙三年十二月蒙古塔海等帥眾南侵荆湖制置使孟珙料其必道施黔以透湖湘設策備之珙兄璟知峽州率兵迎拒於歸州大壩砦得捷於巴東遂復巫抵夔

元至正十二年全蜀爲夏明玉珍所據巫爲僞邊邑珍殂子昇嗣歲辛亥實明太祖金陵登極之四年也時已削平羣雄混一疆宇惟明氏依違不決正月丁丑太祖乃命中山侯湯和爲征西將軍江夏侯周德興爲左副將軍德慶侯廖永忠爲右副將軍暨平章楊璟等率荆

巫山縣志

卷二十

武功

四

湘舟師由瞿唐趨重慶潁川侯傅友德兵趨隆中五年五月丙辰湯和師伐巫山攻瞿唐以江水暴漲駐大溪已未傅友德兵至漢江阻水未渡造舟以濟己卯至漢州欲以消息達湯和而山川懸隔適水漲乃以木牌數千書克階文月日投漢江順流而下守者見之解體六月友德攻漢州守將向大亨戰敗克之先是僞夏聞王師將至悉眾守三峽及階文失守乃分兵投漢州及至而城已下矣西川震動丙戌太祖以湯和等師久逗遛詔責之廖永忠聞命奮起率兵先進會得木牌於江和

亦進兵自白鹽山伐木開道以趨夔守將飛天張疑為張飛

天或張天飛逆戰敗走遂克夔州直抵重慶東川底定云

明成化丙戌四月流賊石和尚等攻破巫山焚燬縣治

五月復攻大昌夔州通判王禎率民兵堵剿死之

明正德庚午年流賊藍廷瑞鄒本恕劉六劉七等攻陷

大昌

隆慶四年橫賊黃何四等作亂江南久為民患六年始

討平之按橫賊施州衛洞蠻也歷來屢為邊害云

崇禎甲戌年二月流賊由楚入蜀有一斗粟整十萬等號縣令周

巫山縣志

卷二十

武功

五

道顯委郭巡檢率民兵數百於縣北地名白丈坡堵截

郭巡檢惜失其名戰敗死之巫城遂陷縣治焚燬官民俱渡

江逃避

崇禎己卯張獻忠等自穀城入川攻巫縣令沈向及鄉

官楊世祿倡率士民守之石碛司女將秦良玉統兵駐

防城外房舍盡被折毀出師至東仙女橋敗績楊監紀

遺其走死名

庚辰年巫之官民與賊對壘者半年是歲巡撫邵捷春

親至大昌城內昌令陳靖芝率家丁出戰屢有斬獲賊

攻破大昌馬渡隘直入雲陽等處邵巡撫督兵進剿四月張獻忠至太平縣瑪瑙山大敗回復圍攻巫山官民嚴加守禦次日解圍而去

崇禎癸未年巴東土賊毛有能屢為邊患以治東六十里香鑪灘為界灘之上屬明灘之下即李闖僭據之地崇禎甲申春賊張獻忠盡驅楚民大舉入川總鎮王之倫倡逃賊前鋒突至兵民亂奔城遂陷水陸各隘悉不守賊遂相繼而入彌山寨野屠人馬為食所擄楚中男婦盡食麥苗草根死者相枕藉大江舟楫絡繹不絕兩

巫山縣志

卷二十

武功

六

月始盡尸橫滿野江水皆臭居民所遺無幾

國朝順治四年五月李自成餘孽高以功

即高李過即李等必正赤心等

共十三家擁眾數萬攻破大昌之橫嵌復攻破邑西之二磴巖執知縣劉嘉增賊親率精銳兵上流竊渡長江失守蹂躪月餘赴施州衛而去繼此三四年于大海李

占春王友進譚誼胡雲鳳等營縱橫擄掠殆無甯歲商賈絕跡耕農失業斗米四兩銀強者掠人而食弱者割尸苟延加之土匪入伍肆凶驕兵悍將屠戮無忌兼有虎豹疾疫百姓死亡殆盡矣

順治辛卯秋九月于大海李占春敗績于孫可旺乃順流東下攻劫巫城而去是冬袁宗第劉體純馬重禧塔天寶李來亨董守太郝永忠等營由南渡地方分據興山巴東巫山大昌等處至康熙二年始削平

康熙十三年吳三桂反二月僞將軍陶繼智劉之復水陸東下過巫直犯彝陵巫令宋書棄官潛遁三月僞將軍王屏藩等至巫隨回川北

康熙十八年僞將楊來嘉王鳳岐劉之衛等自彝陵敗歸盤踞巫山水陸設險十九年總督楊茂勳提督徐治都統滿漢官兵進剿克復

康熙十九年閏八月譚弘復畔據巫山至二十年正月討平之

明置瞿唐施州二衛犬牙相錯以爲防禦正德間藍郡等賊倡亂攻陷巫山大昌以瞿唐衛剿之佐以民兵弘治元年設兵備副使駐劄達州統轄各衛所而各州府縣編簽弓兵民壯名爲鄉勇以時操演用備不虞崇禎七年流寇入川巫山大昌永陸設立十三隘口留石洛門百子東坪巴霧官坪三溪木瓜培石邊魚馬鬃八石

坪馬渡河俱官兵防守而巫令沈向訓練土著官義兵復有鄉兵黨兵糧兵壯兵等名及鄉紳生員共修守禦之具而昌令陳靖之同時訓練民兵設防堵禦甲申獻賊入川沿江失守繼以姚黃于李三王三譚連營江干大肆蹂躪耕耘盡廢千里人煙斷絕及後十三家李來享袁宗第等憑恃險阻盤踞多年寥寥子遺盡爲荷戈之兵我

皇清布昭神武克取滇黔之後康熙元年總督四川大司馬少保李國瑛銳意廓清是以有巨寇久遁天誅之請

巫山縣志

卷二十

武功

八

朝廷可其奏爰

命湖廣陝西四川提督合師進勦水陸雲屯少保授鎮將方略遂復夔郡二年癸卯正月元日進兵羊耳山袁宗第焚營挈老幼遁匿深箐中或謂宜速追少保曰賊之羸誘我也軍於大昌按甲不動度宗第疲且窘乃遣將出奇冒險突擊搗茶園坪袁宗第竄巴東去賀珍子道甯始率其黨歸命不一月而昌平入我版圖矣二月師次巫山牽制賊劉三虎首尾五月鄭提督合師於巫適郝搖旗棄房竹至巴東與諸逆合攻七連坪楚師失利勢

猖獗且謀犯蜀少保謂提鎮曰巫地勢低凹賊眾若遠來利速戰我堅壁以待彼不能久持乘其懈可擊而殲也於是身先士卒繕完城垣北城下錠梅花木椿椿下挑品字深坑西城外之高唐觀地高峻可瞰城中建立敵樓炮臺東城外一阜峻闊築土寨馬少保與提鎮分汎登牌仍策水師鎮總兵譚詣防江爲內外翼時八月二十四日也賊合數萬眾直薄城下攻圍甚銳我軍靜以待之賊築土圍雲梯挨牌晝夜環攻我將士奮力擊賊出城斫圍斬殺過營鄭提督復出奇兵絕賊糧道賊

巫山縣志

卷二十

武功

九

川三三

猶無退志且挖地道攻圍如故少保乘其挫衄勵鎮將於九月初七日黎明四出衝賊營斬首數千賊眾敗走時郝搖旗竄入大甯少保檄各寨鄉勇扼險據守靜聽復諭降賊約還其妻子之被俘者公誠所布入人心腹由是羅茂同嚮風倡順郝袁之萬餘眾接踵歸誠而劉二虎營中隱微機密盡知人懷離叛少保已聚米爲山軍糧有餘矣及西安將軍傅副都統杜大兵繼至十二月滿漢誓師一舉而搗陳家坡再舉而奪老木孔黨類望風若崩厥角體純自縊舉室盡焚乘勝長驅雪夜擊

擒郝袁等渠魁於黃草坡蕩平之速僅八日耳獨來亨負嵎茅麓山康熙三年正月靖西將軍都統穆咨會少保少保卽咨行提督鄭蛟麟撫勦總統署總兵梁如琦重慶鎮總兵程廷俊署副將趙虎臣遊擊黨世昌署副將陳福等恭同

禁旅進偪賊壘少保環視逆寨延袤六百里壁立如削乃分汎據險以困之蜀汎當賊寨西面通梁殊陡絕爲來亨出入咽喉地提督鄭蛟麟簡精銳兵兩奪通梁以扼賊之吭而拊其背少保自黃龍山移汎吳家庄斷絕要路

巫山縣志

卷二十

武功

閏六月初九日賊夜犯通梁殊死戰冀幸免我師奮勇堵截敗去來亨計無所出纒首自焚死馬黨塔王光興窮迫投楚我師凱旋蜀楚以甯是役也

廟謨制勝少保祇承文武同心將士用命舉二十餘年之逋寇數百里之巖疆電掃無餘敷天共慶然以蠢茲頑梗狡焉弗賓勞我

王師經年而後克之經費金錢亦不貲矣况飛挽軍糈數千里深入楚地蜀民受累獨深巡撫都御史張德地時兵馬至楚地應食楚糧民困始蘇非以其地僻山險三

省錯壤狐兔易爲踰伏攻難而守易歟旣於重夔水陸設有六鎮重兵復設巫山營城守遊擊一員守備一員千把六員制兵五百名又設昌甯營遊擊一員守備一員千把六員制兵五百名經制善後之計嚴且密矣康熙十二年冬吳逆叛陶繼智劉之復二僞將軍率兵順流而下直抵荆彝而巫山昌甯爲之不守至十八年僞將楊來嘉敗於鄖陽劉之復王鳳琦敗於彝陵會兵巫山水陸據險十九年鄖陽撫部院楊茂勳奉

命陞四川總督入川征勦會同湖廣提督徐治都暨

巫山縣志

卷二十

武功

十一

州志卷之八

欽差督陣大人蘇赫臣噶由荆彝逆水而進正月二十四日抵巴東西瀼遂議分兵四路水師鎮胡總兵率舟師遊水而上襄陽鎮劉總兵率同督兵呂副將由右路取大昌副將等由左路防賊抄後提督合率官兵由中路於二十六日遇賊於巫山之三會舖而楊劉王三僞將軍悉眾以迎列兵兩山中扼一綫提督分兵進攻鏖戰從辰至申我兵奮勇登山賊乃大潰追殺三十里遂克巫山縣城陣獲僞將軍王鳳琦斬殺賊兵無算次日統兵前征二月初一日取夔州賊勢披靡不能再振至萬

縣降譚弘直抵重慶而傷偽將軍楊來嘉劉之復無所
逃遁悉降一月之間川東悉平蓋由

皇上功德播昭聲靈赫濯故提督二公揆文奮武一乃心力
遂使瞿唐三峽之險不足恃而烏合叛逆之眾無能爲
也賊既平總督楊 奏請設防仍其舊制未幾而譚弘
餘黨又復鴟張新復之地經制未周人心未固譚逆得
乘隙而動兩月之間重夔州縣悉爲所據

朝廷仍命提督徐公會同將軍噶仍率兵進剿賊乃棄巫夔
而據雲陽我兵於二十年正月始滅之遂駐師夔城分

巫山縣志

卷二十

武功

三

兵防巫復立營制巫山昌甯兩營遊守千把兵制各仍
其舊至康熙二十三年

朝廷以四方廓清下議裁汰兩營各額兵五百名

嘉慶元年川東邪匪蜂起有重慶府趨於六月來巫札
諭糧民李彩勸諭習教之家出首免罪縣南一帶投首
者數千人夔州府嚴飭李彩承充軍功二年六月逆匪
王三槐等逼近巫山地界北岸邪匪猖獗而南岸習教
之家出言不軌致閣村有風鶴之警李彩會合該處紳
士公議齊團設卡以防不虞時因青黃不接無糧可給

議將鎮坪寺社穀壹百三十石借應支銷議既定赴縣請示時邪匪繞城打仗四門緊閉不顧生死趨赴城下此時官不暇傳見飭令捕廳彭傳示所稟甚妥急須回鄉辦理乃設立十卡安置各處要路每卡輪派鄉勇六十六名團首三四名旦夕守望至八月十七日忽有人報路隔三十里湖北建始縣所屬之大屋基王姓謀反被鄉勇圍困因力不繼傳知各處團長同心努力李彩聞信一面帶領近處鄉勇五十餘名往查虛實一面傳集遠處鄉勇以便調用十八日四面攻打破其巢穴逆

賊授首擒獲頭目供稱棉花塘墻圍青石板朝東岩等處暨鄰封地方一十八處同謀起事因機關敗露不能湊手耳李彩歸與眾更定章程每十家一連或七八家十一二家不等選清白能事者爲團長一家有事九家連坐卽日與軍功李總分帶鄉勇各數百名圍搜王姓所供之朝東岩張魁先棉花塘高顯斌等家果然逆跡昭者至二十三日將擒獲逆首送縣三十日墻圍逆匪張名貴將欲起事被族內張名科捉獲公議仍交本家處治是日有本縣都司徐捕廳彭帶兵稽查逆匪歇營

該處廟宇壇厯將供出已露形跡之家一一擒獲送交都司捕廳審實解縣懲辦其有不實者各具連環保結釋放九月十三日二官拔營回縣十六日忽探信鄉勇云湖北賊首林之華覃加耀在黃栢山冲卡一路燒殺已至三牌老虎洞地界李彩帶鄉勇五百餘名赴交界處堵禦殊賊眾勢大莫能抵敵兼鄉勇內邪正不一有對陣投入賊營者有臨敵預行逃歸者李彩與張名科奮勇爭先分頭迎敵敗歸聞奉節縣軍功雷安帶鄉勇千餘名存劄九頭山遂偕張清才往意在恢復前功憑

巫山縣志

卷二十

武功

古

高視下見墻圍習教之家放火起事懇雷安發鄉勇圍剿因人心不一未允所請又見張名德家男婦百餘人出門一路燒殺往合林之華賊營李彩卽帶逃難鄉勇尾追數里諸鄉勇畏懼逃竄僅遺李彩與張清才二人聞額侯爺福大人統兵追剿營劄抱峰山王家梁子較子嶺一帶地方李彩卽帶鄉勇十餘名趕營稟見不及復歸二十二日出大溪口見松茂道承勳訴明前情承勳賜彩令箭銀牌諭署松潘營守備劉忠魁帶兵剿殺餘賊李彩隨帶鄉勇會同官兵至杉落坪圍擒教匪羅

傅等家訊實口供交營殺除又擒獲大溪口逆首楊士志逆匪劉世佐胡維漢等殺除開單稟覆道憲蒙賜袍料一疋爾時牌內房舍被燒者一千餘家花糧戶口被殺及鄉勇陣亡者數十餘名縷呈清單赴縣稟報經縣主徐都司徐帶兵至境清查被燒被殺戶口及從賊逆首名目適有本境陳大仁亦曾習教雖未從賊恐難免禍私託人送銀拾兩懇求不死李彩一見駭異因思果未從賊卽係良民何故納銀買命卽以此銀稟明縣主都司並傅集團首紳士等訪查確實本無從賊情事稟

巫山縣志

卷二十

武功

五

明道憲共具保結仍將此銀退還地方無事開單繳令松茂道承勳見其平賊有功賞給六品頂帶執照

嘉慶二年教匪由夔之林家溝繞小道至巫山六水地方盤踞巫城戒嚴知府周景福知縣徐士林委干友珍等齊團防禦乃於北門外深掘濠溝縣東門外一帶築有土墻木柵圍護居民演武廳後玉枕山上築修土城鄉團住劄以爲犄角賊勢眾大猖獗救兵不能驟至六月賊數千人冲破東井街柵欄直逼城下鄉團等遂黑夜于秀峯寺最高處虛張旗幟火號以爲疑兵城上矢

石如雨鎗礮齊發賊勢稍却退劄于邱家坪一帶漫山遍野盡是賊營晝夜攻城不息軍功未得龍帶勇助戰團首馮承其集練乘船擊賊賊踞高阜俯瞰巫城攻逼甚急都司徐朝剛率營兵接戰三敗蹂踏數百人外援不至勢危甚七月十一日參贊德楞泰明將軍率茂功營兵由水路來援友珍等入舟接見面呈地勢乃分兵三路一從東路秀峯寺出官家溪旁殺出一從曾家壩遶北關外大路下驅一從城西之西坪上迎三面合抄勦滅過半餘賊四散城圍始解八月湖北長陽縣賊匪

巫山縣志

卷二十

武功

六

林之華張正朝鄧伯春等數千人侵擾縣南一帶裹脅習教之家焚掠滋事威勇侯額勒登保總督福甯統兵追剿至茅葫壩殺除大半十二月初十日直追至湖北歸州中寶寨擒獲正法其逃回餘匪經松茂道承勦派委官兵團練查實擒斬南鄉一律肅清

三年官兵退後邑西北數十里外尚有教匪四路擄糧出沒不時

嘉慶四年七月副都統銜德楞泰生擒綫號首逆龔文玉於大甯縣之瓦屋溝又擒其偽元帥龔其位於大甯

之香冲及其僞千總卜三聘於巫山縣之羊溪河先是綫號首逆龔文玉在夔州一路爲傳教總師以弟其位爲僞元帥卜三聘爲僞先鋒糾眾七八千人文玉與其位卜三聘龔建張添倫辛聰等均在太甯巫山交界之八石坪屯聚德榜秦探知與朱射斗夾擊攻破賊寨殺賊八百餘名生擒賊目徐正明等六百六十餘名僞先鋒姚先廷探馬頭張宗秦棄械投順先廷發夔州安置宗泰請隨營效力告知文玉欲往徐家壩就徐添德亟追之於瓦屋溝生擒文玉並探馬頭張尙國等先後斬

巫山縣志

卷二十

武功

七

獲賊匪一千四百餘名龔其位遁嗣經搜山弁勇於香冲擒獲並龔文玉之子及文玉之妻同時提督七十五生擒卜三聘並獲其長子卜正順及其子女四名八月又生擒太平黃號賊首龔建於開縣之火峯寨

七年二月知縣徐士林都司袁陞侯集團防衛以境內零匪四竄雖經大兵追勦而奔擾實無定向職員韓鈞捐貲加葺城堞足資守禦第在城兵勇單薄尙不足壯聲威因四門分段集團選派黃承達等八人爲團首每夜各帶器械上城巡視先是教匪擄良民入黨每戰敗

四散官軍擒獲立即正法承達同鄉良民向廷向柱適
在數中極力救之得免復有擄囚入城一少年子年可
十四形同餓丐哭之哀承達又挺身保之當事者曰前
係爾戚此囚乃巴東後里人也何所見而云然達曰是
豈能殺人者耶當事壯其言命隨之歸越歲餘伊父聞
風訪至承達厚贈之使隨父歸蓋憐其老而只此一子
也後又接辦北五牌圍練修理寨碯造劈山鐵礮以
資捍衛閭境漸次安靖

七年九月參贊大臣德楞泰擒達州青號餘黨賊首陳

侍學於巫山縣之黃泡池